



# **FEDERACIÓN GALEGA DE TIRO OLÍMPICO**

**Regulamento electoral para a elección a membros da Asemblea Xeral, Presidente e Comisión Delegada da Federación Galega de Tiro Olímpico.**

PENDENTE APROBACIÓN SXD

# **REGULAMENTO ELECTORAL PARA A ELECCIÓN A MEMBROS DA ASEMBLEA XERAL, PRESIDENTE E COMISIÓN DELEGADA DA FEDERACIÓN GALEGA DE TIRO OLIMPICO**

## **Capítulo I. Disposicións xerais.**

### ***Artigo 1. Obxecto da normativa.***

O presente regulamento electoral ten por obxecto regular o proceso de elección dos órganos de goberno da Federación Galega de Tiro Olímpico —Asemblea Xeral, Presidencia e Comisión Delegada—, así como determinar a súa composición e funcionamento durante o correspondente período electoral.

### ***Artigo 2. Celebración de eleccións.***

A Federación Galega de Tiro Olímpico procederá á elección da súa Asemblea Xeral, Presidente e Comisión Delegada no ano 2026. O calendario electoral será o indicado no anexo a convocatoria das eleccións, calendario que será aprobado pola Secretaría Xeral para o Deporte xunto co regulamento electoral. Os sobres e papeletas serán os establecidos no anexo deste regulamento.

Establécese como horario de apertura ao público da sede federativa durante o proceso electoral o seguinte:

Sede de Lugo (Avenida Duquesa de Lugo, s/n (Casa do Deporte), 27003): de luns a venres de 9:30 a 13:30 horas. En agosto o horario será de 16 a 18 horas . Telefono 982 240241

### ***Artigo 3. Do Regulamento electoral.***

Este regulamento electoral é o conxunto de normas que regula a celebración do proceso electoral da Federación Galega de Tiro Olímpico

A Secretaría Xeral para o Deporte resolverá, no prazo máximo dun mes, desde a entrada do regulamento no seu rexistro, sobre a súa aprobación ou a súa devolución para emendas.

Neste último suposto, indicaranse estas e concederanse dez días hábiles para proceder á dita emenda. Transcorrido un mes sen que a Secretaría Xeral para o Deporte dite ningunha resolución se entenderá aprobado o regulamento.

No caso de ser necesaria a subsanación de emendas, indicaranse as mesmas e se concederán dez días hábiles para proceder a dita corrección.

Unha vez feitas estas modificacións, o novo regulamento presentarase á Secretaría Xeral o deporte para a súa ratificación definitiva.

Unha vez aprobado o regulamento pola Secretaría Xeral para o Deporte, esgotarase a vía administrativa e unicamente poderá ser obxecto de recurso contencioso administrativo.

O regulamento electoral, será publicado no taboleiro de anuncios da Federación Galega de Tiro Olímpico e na páxina web da Federación Galega de Tiro Olímpico ([www.fegato.es](http://www.fegato.es)) no apartado “proceso electoral”.

## **Capítulo II. Órganos electorais.**

### ***Artigo 4. Comisión xestora. Composición duración e funcións***

1. Unha vez convocadas as eleccións, a xunta directiva da federación entenderase disolta, asumindo as súas funcións unha comisión xestora.

2. A composición da comisión xestora da Federación Galega de Tiro Olímpico, que estará formada por 8 membros máis unha presidencia, será a seguinte:

a) 4 membros elixidos pola comisión delegada, debendo ter representación, por este orde, os estamentos de: entidades deportivas, deportistas, xuíces/árbitros e adestradores e adestradoras. Esta regra de representatividade deberá observarse tanto na designación das persoas titulares coma das suplentes.

b) 4 membros designados pola xunta directiva antes da súa disolución entre os que se deberán incluír as persoas que exercerán as funcións de secretaria e tesourería da federación. Esta regra de representatividade deberá observarse tanto na designación das persoas titulares coma das suplentes.

c) A presidencia da comisión xestora corresponderá a quen presida a Federación Galega de Tiro Olímpico ou, cando cese en dita condición cando finalice o seu mandato, cando renuncie ao posto, ou cando presente a candidatura a persoa integrante da asemblea ou á presidencia da federación, quen sexa elixida para tal función por e entre as persoas que integren a comisión xestora.

3. As persoas que presenten a súa candidatura para formar parte dos órganos de goberno e representación da Federación non poderán ser membros da comisión xestora, debendo cesar en dita condición ó presentar a candidatura en cuestión.

4. A comisión xestora entenderase extinguida unha vez tomen posesión todos os membros dos órganos de goberno da Federación Galega de Tiro Olímpico.

5. A comisión xestora será o órgano encargado de administrar e xestionar a Federación durante o proceso electoral, non poderán realizar actos que directa ou indirectamente, mediata ou inmediatamente, induzan ou condicionen o sentido do voto dos electores, e deberán observar os principios de obxectividade, transparencia do proceso electoral e igualdade entre os actores electorais. Estas accións serán aplicables á actividade desenvolvida polo persoal da federación e polos restantes órganos federativos durante o proceso electoral.

6. Se por circunstancias ou incidencias xurdidas durante o proceso electoral a finalización do mesmo se demorase en exceso, dificultando, comprometendo ou poñendo en risco o desenvolvemento ordinario da actividade deportiva da Federación, a comisión xestora, coa supervisión e autorización da Secretaria Xeral para o Deporte, poderá adoptar as medidas imprescindibles para evitar dita situación.

#### ***Artigo 5. Da xunta electoral. Composición e duración Funcións.***

1. Constituirase unha única xunta electoral que será o órgano encargado e de control das eleccións. Deberá resolver en primeira instancia as reclamacións que se presenten contra toda decisión adoptada no proceso electoral, agás a convocatoria das eleccións e a adopción do acordo polo que se aproba o regulamento electoral que unicamente poderá ser obxecto de recurso directamente ante o Comité Galego de Xustiza Deportiva.

O seu correo electrónico será: [Xuntaelectoral2026@fegato.es](mailto:Xuntaelectoral2026@fegato.es)

2. A xunta electoral estará integrada por tres membros titulares e tres suplentes, que serán elixidos e designados pola asemblea xeral na mesma sesión na que se aproba o regulamento electoral, entre as persoas que presenten a súa candidatura a membros de xunta electoral. As candidaturas deberanse presentar na mesma asemblea na que se celebre a súa elección, podendo estar os candidatos presentes na mesma.

De non existir candidaturas, serán designados pola comisión delegada e de non existir esta, pola persoa titular da presidencia da federación no prazo de tres días hábiles dende a celebración de dita asemblea.

As súas reunións celebraranse na sede federativa ou por medios telemáticos tantas veces sexa necesario e ás súas decisións serán publicadas no taboleiro de anuncios e na web da Federación na sección procesos electorais. As persoas integrantes da xunta electoral poderán ser validamente convocadas para que a sesión se celebre en varios lugares simultaneamente sempre que os medios técnicos permitan o normal desenvolvemento da sesión e o respecto dos dereitos das persoas membros.

3. As persoas candidatas a membros da xunta deberán reunir os seguintes requisitos:

a) Ser maior de 18 anos.

- b) Ter, cando menos, o título de bacharelato superior ou equivalente.
  - c) Non formar parte dos órganos de goberno da federación, nin da comisión xestora nin ostentar postos directivos na federación.
  - d) Non presentarse como candidato a membro da asemblea xeral. No suposto de presentarse como candidato a membro da Asemblea xeral ou á presidencia da federación cesará no seu posto na xunta electoral e será substituído polo suplente.
  - e) Non estar cumprindo sanción disciplinaria firme ou sanción administrativa firme en materia deportiva que comporte sanción de inhabilitación para ocupar cargos nunha organización deportiva.
  - f) Aceptar expresamente o cargo de membro da xunta electoral.
4. Poderán ser candidatas a membros da xunta electoral as persoas que non teñan a condición de federada ou de membro da asemblea.
5. Os membros da xunta electoral elixirán entre eles ás persoas que desempeñen a presidencia e a secretaría da mesma. No seu defecto, ostentará a presidencia da xunta electoral o membro elixido de entre eles de maior idade e a secretaría o de menor idade.
6. A xunta electoral constituirase no prazo máximo de dous días hábiles desde a data da convocatoria do proceso electoral.
7. Ao día seguinte da constitución da xunta electoral, a persoa que ocupe a secretaría desta enviará á Secretaría Xeral para o Deporte a relación de persoas que constitúen a xunta electoral.
8. O mandato dos membros da xunta electoral será ata a convocatoria do seguinte proceso electoral, e as eventuais vacantes que se produzan serán cubertas polo mesmo procedemento e cunha duración polo tempo restante ata a convocatoria do seguinte proceso electoral.
9. Son funcións da xunta electoral:
- a) Velar polo axustamento a dereito do proceso electoral dos órganos de goberno e representación federativos.
  - b) Organizar os procesos das eleccións para a asemblea xeral e presidente da federación, segundo o disposto neste regulamento electoral.
  - c) Designar as mesas electorais de conformidade co previsto neste regulamento electoral.
  - d) Proclamar as candidaturas a membros da asemblea xeral e a presidencia que reúnan os requisitos esixidos.

e) Garantir a exposición de censos, candidaturas e outros documentos segundo se estableza neste regulamento electoral.

f) Coñecer e pronunciarse, en primeira instancia, sobre as reclamacións que se presenten en materia electoral. A xunta electoral esta obrigada a resolver expresamente e no prazo concedido ao efecto todas as reclamacións que se formulen.

g) Custodiar a documentación correspondente a todo o proceso electoral, excepto o que non lle corresponda do procedemento do voto por correo, ata a súa finalización que será cando remate o prazo para a impugación da toma de posesión da presidencia da federación.

h) En xeral, cantas facultades lle sexan atribuídas por este regulamento electoral.

10. As decisións da xunta electoral tomaranse por maioría de votos, non sendo admisible a abstención.

11. A asistencia á xunta electoral é obrigatoria salvo ausencia xustificada.

### **Capítulo III. Das persoas electoras e elixibles á Asemblea Xeral.**

#### ***Artigo 6. Das persoas electoras e elixibles á Asemblea Xeral.***

1. Poderán ser persoas electores e elixibles á asemblea xeral:

a) Nos estamentos constituídos por persoas deportistas, persoas que ostenten a condición de xuíces/árbitros, e técnicos/adestradoras, as persoas que reúnan os seguintes requisitos:

1º Ser maior de idade na data de celebración das votacións.

2º Ter licenza federativa en vigor pola correspondente federación deportiva galega na data de convocatoria das eleccións e as dúas tempadas anteriores á da celebración das eleccións.

3º Ter participado nas tempadas 2024 e 2025 nunha competición deportiva oficial celebrada en alomenos dúas tempadas.

Este requisito non será esixido para o caso das persoas que ostenten a condición de xuíces e árbitros.

No caso de que, por causa de forza maior, non se tivesen realizado competicións deportivas oficiais no período indicado anteriormente, abondará con ter participado nunha competición deportiva oficial na tempada do último calendario oficial desenvolvido.

Ademais dos anteriores requisitos, comúns para ser elector e elixible, constitúe requisito específico de elixibilidade nestes estamentos que se trate de persoas que non estean inhabilitadas

para ocupar cargos directivos ou de representación no ámbito deportivo por resolución firme na vía administrativa ditada polo órgano disciplinario competente, nin estar inhabilitadas para o desempeño de cargo público ou de representación por sentenza xudicial firme.

b) No estamento de entidades deportivas, as que reúnan os seguintes requisitos:

1º Inscripción desde o mes de xaneiro dos dous anos anteriores ao de celebración das eleccións na federación correspondente e no Rexistro de Entidades Deportivas de Galicia.

2º Participación nas tempadas 2024 e 2025 nunha competición deportiva oficial alomenos en dúas tempadas.

No caso de que, por causa de forza maior, non se tivesen realizado competicións deportivas oficiais no período indicado anteriormente, abondará con ter participado nunha competición deportiva oficial na tempada do último calendario oficial desenvolvido.

Ademais dos anteriores requisitos, comúns para ser elector e elixible, non serán elixibles as entidades deportivas filiais ou dependentes que teñan esta consideración segundo os estatutos ou normas da federación correspondente. A efectos electorais equipararanse a estas entidades as que, a pesar de ter estruturas independentes, compartan a lo menos un 50% das súas licenzas.

2. Entenderanse como competición deportiva oficial a incluída como tal no calendario oficial da respectiva federación deportiva de Galicia ou a así cualificada polo órgano superior da Administración autonómica competente en materia de deporte. Tamén terán esta consideración as competicións estatais e internacionais oficiais da respectiva federación española ou internacional ás cales a federación galega de Tiro Olímpico estea adscrita.

3. As persoas membros da federación que pertencen a dous ou mais estamentos no censo provisional, deberán optar por un deles, mediante escrito dirixido á xunta electoral que deberá cursarse no período de reclamacións ao censo provisional. O criterio para identificar os electores nun único estamento, no caso de non exercer a opción individual, serán, por esta orde:

No censo de deportistas

No censo de xuíces-árbitros.

No censo de adestradores.

As entidades deportivas e os deportistas que teñan actividade nas tres modalidades (prato, precisión e recorridos de tiro), e cumprindo os requisitos esixidos en cada unha delas, optaran a unha delas mediante escrito dirixido á Xunta Electoral que deberá cursarse no período de reclamacións ao censo provisional. De non facelo, figuraran no censo en que teñan maior número de licenzas federativas.

4. Poderán ter a condición de elixibles aquelas persoas físicas e xurídicas que atopándose sancionada por un procedemento disciplinario deportivo, a sanción non comporte a inhabilitación da condición de elixible.

5. A licenza federativa única é a expedida pola federación galega de tiro olímpico. No caso de electores que cumprindo os requisitos establecidos no presente artigo, dispoñan dunha licenza federativa única expedida por unha federación distinta da galega, deberán solicitar por escrito, dirixido á xunta electoral, a súa intención de participar no proceso electoral no prazo establecido neste regulamento referente o censo inicial.

Artigo 6 bis. Participación deportiva.

Para os efectos deste regulamento entenderase por competición oficial aquela incluída no calendario oficial aprobado pola Federación Galega de Tiro Olímpico ou recoñecida pola federación española ou internacional correspondente.

#### ***Artigo 7. Das persoas electoras e elixibles á presidencia da federación e á comisión delegada.***

1. Poderán ser electoras á presidencia da federación e á comisión delegada as persoas asembleístas que resulten elixidos nas eleccións do ano 2026.

2. Poderán ser elixibles para a presidencia da federación as persoas que cumpran, na data de celebración da elección, os seguintes requisitos:

a) Ser maior de idade e presentar unha candidatura avalada, como mínimo, polo 10% dos membros da asemblea, non sendo necesario que a persoa que presente a candidatura teña a condición de asembleísta nin de afiliada á federación deportiva correspondente.

b) Non estar inhabilitada para ocupar cargos directivos ou de representación no ámbito deportivo por resolución firme na vía administrativa ditada polo órgano disciplinario competente, nin estar inhabilitadas para o desempeño de cargo público ou de representación por sentenza xudicial firme.

c) Non ter sido condenado por delitos contra á facenda pública estatal ou autonómica galega nin contra a Seguridade Social, o que se acreditará mediante a presentación da correspondente declaración pola persoa interesada.

3. Poderán ser elixibles para a comisión delegada as persoas físicas (deportistas, adestradores e xuíces/árbitros) é xurídicas (entidades deportivas) que teñan a condición de membro da asemblea xeral na data da celebración da elección.

#### **Capítulo IV. Dos censos electorais.**

##### ***Artigo 8. Censo electoral***

1 Elaboraranse tres tipos de censo electoral:

- a) censo inicial;
- b) censo provisional;
- c) censo definitivo.

2 O censo electoral ordenarase alfabeticamente e estruturarase en listas separadas por estamentos, por especialidades deportivas, de ser o caso, e por circunscrición electoral.

3 O censo incluíra as persoas físicas e xurídicas que reúnan os requisitos para seren electoras conforme ao disposto neste regulamento.

4 No caso das persoas físicas incluídas no censo, figurarán, cando menos, os seguintes datos:

- a) nome e apelidos;
- b) sexo;
- c) número de licenza federativa;
- d) documento identificativo, do que só se farán constar os catro últimos díxitos;
- e) club de pertenza;
- f) especialidade deportiva, de ser o caso;
- g) condición de deportista de alto nivel, cando proceda;
- h) enderezo e correo electrónico, que poderá ser o do club ou o indicado expresamente pola persoa interesada para estes efectos.

5 No caso das entidades deportivas, incluíranse, cando menos, os seguintes datos:

- a) denominación social;
- b) enderezo;
- c) número de inscrición no Rexistro de Entidades Deportivas de Galicia;
- d) correo electrónico;
- e) identificación da persoa representante legal que exercerá o dereito de voto.

6 A representación das entidades deportivas corresponderá, con carácter xeral, á persoa que ostente a súa presidencia, salvo designación expresa doutra persoa integrante da xunta directiva, acreditada mediante certificación do Rexistro de Entidades Deportivas de Galicia.

7 O tratamento dos datos persoais contidos no censo electoral terá como única finalidade garantir o exercicio do dereito de sufraxio e a transparencia do proceso electoral, e axustarase ao disposto no Regulamento (UE) 2016/679 e na Lei Orgánica 3/2018. Queda prohibida a utilización dos datos para finalidades distintas das propias do proceso electoral. Non poderá facilitarse información individualizada dos datos persoais contidos no censo, agás nos supostos legalmente previstos.

8 Nos dous primeiros meses do ano electoral, a federación elaborará o censo electoral inicial, que será exposto durante catorce días hábiles no taboleiro de anuncios e na páxina web oficial da federación, no apartado “procesos electorais”.

9 Durante o prazo de exposición do censo inicial poderán presentarse reclamacións, rectificacións ou solicitudes de modificación ante a xunta directiva, que as resolverá no prazo de cinco días hábiles.

10 Unha vez revisado, o censo inicial remitirase á Secretaría Xeral para o Deporte xunto coa documentación complementaria exixida pola normativa aplicable.

11 Á vista da documentación validada pola Secretaría Xeral para o Deporte, elaborárase o censo electoral provisional, que se publicará simultaneamente coa convocatoria electoral e será exposto durante dez días hábiles.

12 Durante o prazo de exposición do censo provisional poderán presentarse reclamacións ante a xunta electoral.

13 A xunta electoral resolverá as reclamacións ao censo provisional no prazo de cinco días hábiles. Contra as resolucións que dite poderá interpoñerse recurso ante o Comité Galego de Xustiza Deportiva no prazo de tres días hábiles.

14 Resoltos os recursos ou transcorridos os prazos sen a súa presentación, o censo provisional elevarase a definitivo.

15 O censo definitivo será exposto ata o día da votación e non se admitirán modificacións posteriores, agás as derivadas de resolucións firmes dos órganos competentes.

16 Unha vez aprobado o censo definitivo, a xunta electoral poderá efectuar os axustes na distribución de representantes por estamentos, especialidades e circunscricións que resulten necesarios como consecuencia das variacións derivadas do propio censo. Contra esta decisión poderá interpoñerse recurso ante o Comité Galego de Xustiza Deportiva nos prazos establecidos na normativa aplicable

## **Capítulo V. Das mesas electorais.**

### ***Artigo 9. Mesas electorais.***

Para a celebración das votacións constituiranse tres tipos de mesa electoral:

I) Mesa electoral para a votación a candidatos da asemblea xeral da federación galega de tiro olímpico. Aínda que a circunscrición electoral e autonómica é única, para facilitar as votacións, constituiranse catro mesas electorais, unha por provincia, para a elección dos membros da asemblea no día fixado no calendario electoral. O horario de apertura das mesas electorais, será o seguinte: 16:00 a 20:30 horas. Ubicaranse nos seguintes locais:

Mesa número 1. Provincia de A Coruña: Club de Tiro Olímpico Laracha, Lugar de Vilar da Fraga s/n. 15145 Laracha – (A Coruña)

Mesa número 2. Provincia de Lugo: Sé da Federación Galega de Tiro Olímpico, Avd. Infanta Elena-Casa do Deporte, s/n-27003 Lugo

Mesa número 3. Provincia de Ourense: Centro de Tiro Eiroas, Rúa dos Chaos, 51-32001 Ourense.

Mesa número 4: Provincia de Pontevedra. Club de Tiro Olímpico Cernadiñas Novas, Lugar Filgueira, 114 San Andrés de Xeve-36154 Pontevedra

1. A mesa electoral de cada circunscrición estará composta por tres membros titulares (unha presidencia, unha secretaría e unha vogalía) e tres suplentes destas, elixidos por sorteo pola xunta electoral entre os integrantes do censo definitivo. Serán presidente e secretario os membros de maior e menor idade respectivamente. A asistencia á mesa electoral é obrigatoria salvo causa xustificada que deberá ser autorizada pola xunta electoral.

2. A designación dos membros titulares e suplentes da mesa electoral realizarase nos dous días hábiles seguintes ao da proclamación definitiva das candidaturas, o sorteo, que incluírá o sorteo da mesa electoral do voto por correo, realizarase pola xunta electoral. As persoas propostas deberán aceptar esta designación no prazo dos dous días hábiles seguintes, agás causa xustificada e documentada que lles impida a aceptación do cargo.

3. Non poderán formar parte da mesa electoral as persoas candidatas á elección de membros da asemblea xeral.

4. Para cada mesa electoral, os candidatos poden nomear interventores da súa candidatura.

5. Son funcións da mesa electoral:

a) Comprobar a identidade dos votantes.

b) Recoller a papeleta de voto e depositala na urna pechada e preparada aos efectos.

c) Proceder ao recuento de votos.

d) Levantar acta dos votos emitidos, dos resultados e de calquera outra incidencia, así como das incidencias e reclamacións, se as houber, facendo constar o número de votos obtidos por cada candidato.

e) Remitir á xunta electoral e a Secretaria Xeral para o Deporte a acta que será subscriba por todos os membros da mesa electoral, así como polas persoas interventoras, se os houbera, e remitirase polo secretario, ao día seguinte das votacións á xunta electoral que deberá garantir a súa exposición pública mediante publicación no taboleiro de anuncios e na páxina web da federación, no apartado “proceso electoral”.

## II) Mesa electoral de voto por correo.

A xunta electoral designará unha mesa electoral do voto por correo que adecuará o seu funcionamento e obrigas ao disposto no apartado I) deste artigo, coas seguintes peculiaridades:

- a) A súa sede será a da Secretaría Xeral para o Deporte.
- b) Constituirase ás 16.00 horas do segundo día hábil seguinte á data de celebración da votación presencial. A persoa que asuma as funcións de secretario da xunta electoral deberá achegar a esta mesa electoral o censo definitivo coa indicación das persoas que exerceran o voto presencialmente, coa finalidade de garantir que non se computen os votos por correo que puidesen emitir as ditas persoas.
- c) Formará parte da mesa como un vogal máis da mesma unha persoa que ostente a condición de empregada pública designada pola persoa responsable da Secretaría Xeral para o Deporte. No suposto de empates o voto do presidente será dirimente.

## III) Mesa electoral para a votación á presidencia e á comisión delegada da federación.

- a) A mesa electoral para a votación á presidencia da federación constituirase o día da votación no local ubicado en Avenida Duquesa de Lugo, s/n (Casa del Deporte), 27003 de Lugo e adecuará o seu funcionamento, obrigas e funcións ao disposto no apartado I) deste artigo.
- b) A mesa electoral estará composta por tres membros: unha presidencia, unha secretaria e unha vogalía, elixidos por sorteo entre os membros da asemblea xeral. O sorteo será realizado pola xunta electoral da federación o día seguinte hábil á proclamación definitiva de candidatos á presidencia.
- c) Ostentarán a presidencia e a secretaria os membros de maior e menor idade desta mesa electoral, respectivamente. Así mesmo, e ata que conclúa a elección da presidencia da federación, exercerán as funcións da presidencia e secretaria da asemblea xeral da federación.
- c) Non poderán formar parte da mesa electoral as persoas candidatas á presidencia da federación nin as candidatas á Comisión Delegada.
- d) Primeiro elixirase a presidencia da federación e a continuación procederase á elección dos membros que correspondan da comisión delegada da federación, entre os candidatos de cada estamento polos membros asembleístas de cada un deles .

IV) Unha vez constituídos todos os órganos reitores da federación entenderanse disoltas as mesas electorais.

### ***Artigo 10. Das persoas interventoras.***

1. Por cada mesa electoral, as persoas candidatas poden nomear interventoras da súa candidatura a calquera persoa maior de idade que serán identificadas ante a xunta electoral cunha antelación non inferior a tres días do día de realización das respectivas votacións.

Correspóndelle á xunta electoral expedir a correspondente acreditación como interventora.

2. As interventoras poderán participar nas deliberacións da mesa, con voz pero sen voto, así como solicitarlle certificacións e formularlle protestas, todo iso sen prexuízo da lexitimación que lles corresponde para presentar recursos ante a xunta electoral e o Comité Galego de Xustiza Deportiva.

3. A Secretaria Xeral para o Deporte poderá designar, entre o seu persoal, a observadores nas mesas electorais coa función de comprobar o desenvolvemento das votacións, debendo emitir un informe do observado na xornada de votación.

## **Capítulo VI. Do proceso electoral.**

### ***Artigo 11. Convocatoria.***

1. A convocatoria das eleccións será feita polo presidente da Federación Galega de Tiro Olímpico, conforme a este regulamento electoral, aprobado pola Secretaría Xeral para o Deporte.

2. Simultaneamente á convocatoria de eleccións, a xunta directiva disolverase, constituíndose unha comisión xestora que non poderá realizar mais que actos de mera administración e trámite.

3. A convocatoria de eleccións comunicarase a Secretaria Xeral para o Deporte e publicarase no taboleiro de anuncios da sede da federación, así como na súa páxina web da federación [www.fegato.es](http://www.fegato.es), tanto na principal como na sección “procesos electorais”. O acceso a esta sección non precisara previa solicitude.

A convocatoria de eleccións conterà cantos datos se precisen para o correcto desenvolvemento do proceso electoral, e sinaladamente:

- O calendario electoral aprobado e selado pola Secretaría Xeral para o Deporte.
- O censo electoral provisional.
- A distribución do número de persoas membros da asemblea xeral por especialidades, estamentos e circunscricións electorais que deberá reflectir a distribución inicial establecida no regulamento electoral do número de representantes asignado a cada circunscrición por especialidade e por estamento.
- A data, lugar e o horario de celebración das votacións.

- Os modelos oficiais de sobres e papeletas.
- O regulamento electoral.
- O procedemento e os prazos para o exercicio do voto por correo.
- A forma de remisión da documentación á xunta electoral e á Secretaría Xeral para o Deporte.
- A composición nominal da xunta electoral da Federación e os prazos para a súa recusación, así como os enderezos postal e electrónico de uso exclusivo da xunta electoral.

4. A convocatoria deberá ser obxecto da máxima publicidade e difusión posibles, utilizando todos os medios electrónicos e informáticos dos que dispón a federación, a lo menos no taboleiro de anuncios e na páxina web da federación galega de [www.fegato.gal](http://www.fegato.gal).

Esta publicación será avalada, mediante certificación da Secretaria Xeral da Federación Galega de Tiro Olímpico e será exposta xunto coa documentación anterior. Esta certificación deberá ser remitida á Secretaría Xeral para o Deporte.

5. O acto da convocatoria poderá ser recorrido ante o Comité Galego de Xustiza Deportiva no prazo de tres días hábiles desde a data da súa completa publicación, de acordo a certificación anterior.

### ***Artigo 12. Calendario electoral.***

1. O calendario electoral para a elección dos membros dos órganos reitores da federación respectará os prazos, obrigas e prohibicións establecidos no decreto regulador dos procesos electorais das federacións deportivas galegas.

2. O calendario electoral se publicará como anexo a convocatoria do proceso electoral.

3. Os prazos deste calendario para a presentación de escritos, reclamacións e recursos, cando estean sinalados por días, entenderase días hábiles e expirarán ás 14:00 horas do derradeiro día de prazo, salvo disposición en contrario. Se o día final do prazo coincide con día inhábil de carácter autonómico ou estatal, ou cun día no que non estean abertas as dependencias da federación en aplicación do convenio colectivo dos traballadores de entidade, entenderase que remata o día hábil inmediato seguinte.

### ***Artigo 13. Circunscricións electorais.***

A circunscrición electoral para elixir:

- a) As persoas representantes das entidades deportivas na asemblea xeral é autonómica.

b) As persoas membros do estamento de deportistas é autonómica

c) A técnicos, xuíces e árbitros e, se é o caso, outros colectivos interesados é autonómica.

#### ***Artigo 14. Da campaña electoral.***

1. Entendese por campaña electoral o conxunto de actividades lícitas levadas a cabo polas persoas candidatas encamiñadas á captación de sufraxios.

2. A campaña electoral iniciarase ás 00:00 horas do día posterior á proclamación definitiva de candidaturas e rematará ás 00:00 horas do día inmediatamente anterior á data fixada para a votación; desde este momento non se poderá realizar propaganda algunha en favor de ningunha candidatura.

#### ***Artigo 15. Papeletas e sobres.***

1. As papeletas dos/das candidatos/as e os sobres de votación serán facilitados, en número suficiente, pola xunta electoral da federación á mesa electoral correspondente.

2. As papeletas confeccionaranse en cores diferentes para cada estamento que vaia obter representación na asemblea xeral.

### **Capítulo VII. Do sistema de elección a membros da asemblea xeral.**

#### ***Artigo 16. Das listas abertas.***

1 A elección das persoas membros da Asemblea Xeral realizarase mediante o sistema de listas abertas, no que as persoas electoras poderán votar a candidaturas individuais correspondentes ao seu estamento, especialidade e, de ser o caso, circunscrición electoral.

2 Cada persoa electora poderá sinalar na papeleta un número máximo de candidaturas superior en unha unidade ao número de representantes a elixir no seu estamento e especialidade.

3 Resultarán elixidas as persoas candidatas que obteñan maior número de votos ata completar o número de postos asignados a cada estamento e especialidade.

4 No caso de empate entre candidaturas que afecte á asignación de postos, resolverase mediante sorteo realizado pola xunta electoral.

#### ***Artigo 17. Sistema de votación e escrutinio para a elección da Asemblea Xeral***

1. A elección das persoas membros da Asemblea Xeral realizarase mediante sufraxio libre, directo, igual e secreto.

2. A votación efectuarase en urnas separadas por estamentos e, de ser o caso, por especialidades deportivas, durante o horario fixado na convocatoria electoral.
3. O dereito de voto acreditarase mediante a inscrición no censo electoral definitivo e a identificación da persoa electora mediante documento oficial válido.
4. Cada persoa electora poderá sinalar na papeleta un número máximo de candidaturas superior en unha unidade ao número de representantes a elixir no seu estamento e especialidade.
5. Serán nulas as papeletas que:
  - superen o número máximo de candidaturas sinalables,
  - inclúan persoas non candidatas,
  - ou non permitan determinar de forma inequívoca a vontade da persoa electora.
6. Finalizada a votación, procederase ao escrutinio público, que será realizado pola mesa electoral correspondente.
7. Resultarán elixidas as persoas candidatas que obteñan maior número de votos ata cubrir o número de postos asignados a cada estamento e especialidade.
8. En caso de empate entre candidaturas que afecte á asignación de postos, este resolverase mediante sorteo realizado pola xunta electoral.
9. Unha vez efectuado o escrutinio, a xunta electoral proclamará provisionalmente as persoas candidatas electas.
10. Contra a proclamación provisional poderá interpoñerse recurso ante o Comité Galego de Xustiza Deportiva no prazo de tres días hábiles.
11. Resoltos os recursos ou transcorrido o prazo sen a súa presentación, a proclamación elevarase a definitiva.
12. No caso de que o número de candidaturas presentadas nun estamento sexa igual ou inferior ao número de postos a cubrir, non será necesaria a votación, proclamándose automaticamente electas as persoas candidatas.
13. As vacantes que se produzan durante o mandato cubriranse, dentro de cada estamento, polas persoas candidatas non elixidas que obtivesen maior número de votos, por orde decrecente.

14. No caso de non existir candidaturas suficientes para cubrir vacantes, poderán convocarse eleccións parciais cando estas superen o vinte por cento dos membros do estamento correspondente.

### **Artigo 18. Composición da Asemblea xeral.**

O número de membros da Asemblea Xeral será de 45 .

Estamento de entidades deportivas: 28 representantes.

Todas as entidades deportivas que cumpran os requisitos establecidos neste regulamento estarán representadas na Asemblea Xeral a través da persoa que ostente a súa representación legal.

Estamento de deportistas: 11 representantes:

- Modalidade de precisión: 7
- Modalidade de recorridos de tiro: 2
- Modalidade de prato: 1
- Deportista Galego de Alto Nivel (DGAN): 1

Estamento de adestradores: 3 representantes:

- Precisión: 1
- Prato: 1
- Recorridos de tiro: 1

Estamento de xuíces/árbitros: 3 representantes:

- Precisión: 1
- Prato: 1
- Recorridos de tiro: 1

### ***Artigo 19. Proporcionalidade na composición da Asemblea xeral.***

1.A composición da Asemblea Xeral distribuirase por estamentos de conformidade coa normativa autonómica aplicable, respectando as seguintes proporcións:

- a) **Entidades deportivas:** entre o 40 % e o 70 %, establecéndose en 28 membros (62,22 %).
- b) **Deportistas:** entre o 20 % e o 40 %, establecéndose en 11 membros (24,44 %). Dentro deste estamento, reservarase unha praza para persoas que ostenten a condición de deportista galego/a de alto nivel na data de aprobación do censo provisional.
- c) **Adestradores/as:** entre o 5 % e o 20 %, establecéndose en 3 membros (6,67 %).
- d) **Xuíces/árbitros:** entre o 5 % e o 10 %, establecéndose en 3 membros (6,67 %).

2.Unha vez aprobado o censo electoral definitivo, a xunta electoral, no prazo máximo de dous días hábiles, determinará o número concreto de representantes que corresponde a cada estamento, de conformidade coas porcentaxes e criterios establecidos neste regulamento.

Esta determinación será notificada á Secretaría Xeral para o Deporte para a súa autorización ou, de ser o caso, modificación.

A resolución da Secretaría Xeral para o Deporte esgota a vía administrativa.

3.A asignación dos representantes dentro de cada estamento realizarase respectando os criterios de distribución por especialidades deportivas e, de ser o caso, circunscricións electorais, en función do número de persoas incluídas no censo electoral definitivo.

4.No caso de que o número de candidaturas presentadas nun estamento sexa igual ou inferior ao número de postos a cubrir, non será necesaria a celebración de eleccións para ese estamento, proclamándose automaticamente electas as persoas candidatas.

Non obstante, se durante o mandato se produce un número de vacantes superior ao vinte por cento dos membros dun estamento, poderán convocarse eleccións parciais para a súa cobertura.

#### ***Artigo 20. Das persoas candidatas a membros electos da asemblea xeral.***

1. Poderá ser persoa candidata a membro da asemblea xeral toda persoa física ou xurídica incluída no censo definitivo que o solicite persoalmente, por correo certificado ou por calquera outro medio que acredite fidedignamente en dereito a dita solicitude, ante a xunta electoral. No prazo de 5 días contados desde a publicación do censo definitivo.

2. Unha vez rematado o prazo anterior, a xunta electoral no día hábil seguinte proclamará a lista provisional de candidatos facéndoa pública no taboleiro de anuncios e na páxina web da Federación Galega de Tiro Olímpico, na sección “procesos electorais”.

3. Poderán formularse reclamacións contra dita lista provisional de persoas candidatas no prazo 3 días hábiles ante a xunta electoral, que disporá de idéntico prazo para resolver que para presentar recurso.

4. Contra a resolución da xunta electoral poderá interpoñerse, no prazo de tres días hábiles, recurso ante o Comité Galego de Xustiza Deportiva que deberá resolver no prazo de sete días hábiles.

5. Unha vez resoltos os posibles recursos si os houbera, a xunta electoral no prazo máximo de dous días hábiles, procederase á proclamación definitiva de candidatos.

#### ***Artigo 21. Das candidaturas á presidencia da federación galega.***

1. Poderá presentar candidatura á presidencia da federación galega de tiro olímpico aquelas persoas que reúnan os requisitos establecidos no artigo 7.
2. O prazo para presentar as candidaturas é de cinco días hábiles, contados desde a proclamación definitiva de persoas membros da asemblea xeral. A presentación de candidaturas farase persoalmente, por correo certificado ou por calquera outro medio que acredite fidedignamente en dereito a dita solicitude, ante a xunta electoral.
3. As persoas candidatas á presidencia deberán presentar as súas candidaturas e deberán ir avaladas polo 10% dos membros da asemblea xeral. Un membro poderá avalar cantos candidatos considere oportunos.
4. A xunta electoral procederá a comprobar a validez dos avais presentados por cada persoa candidata e, a continuación proclamará as candidaturas que cumpran os requisitos para ser elixible.
5. Unha vez presentadas as candidaturas, a xunta electoral, no prazo de dous días, proclamará a lista provisional de persoas candidatas e farana pública no taboleiro de anuncios da federación e das delegacións provinciais, de ser o caso, e na páxina web na sección “procesos electorais”.
6. Poderán formularse reclamacións contra a lista provisional de persoas candidatas, no prazo de 3 días hábiles, ante a xunta electoral, que disporá de idéntico prazo para resolver.
7. Contra a resolución da xunta electoral poderá interpoñerse, no prazo de tres días hábiles, recurso ante o Comité Galego de Xustiza Deportiva que deberá resolver no prazo de sete días hábiles.
8. A proclamación definitiva de persoas candidatas á presidencia efectuarase no prazo de dous días hábiles desde a resolución do recurso anterior.
9. A persoa que resulte elixida como presidente non poderá desempeñar ningunha outra actividade directiva ou de representación dentro da propia estrutura federativa e non se poderá simultáneas a presidencia dunha entidade deportiva coa presidencia da federación deportiva na que se integre a dita entidade deportiva.

***Artigo 22. Proclamación dos membros da asemblea xeral.***

1. Unha vez realizado o escrutinio do voto por correo, este remitirase á xunta electoral que proclamará provisionalmente as persoas que formarán parte da asemblea xeral. En caso de empate entre dous ou mais candidatos este resolverase, mediante sorteo, á elección da persoa que será membro da Asemblea Xeral.

2. Contra o acordo de proclamación provisional efectuado pola xunta electoral, poderá presentarse recurso ante o Comité Galego de Xustiza Deportiva no prazo de tres días hábiles que deberá resolver nun prazo de sete días hábiles.

3. Finalizado o prazo para a interposición dos recursos ou, se é o caso, resoltos estes recursos administrativos, a proclamación de candidatos electos elevarase a definitiva.

4. As persoas candidatas que non resultaran electas conformarán unha listase ordenada de maior a menor número de votos por estamentos e cubrirán as vacantes que se produzan na asemblea xeral durante o mandato electoral.

5. No caso de renuncia ou vacante da metade mais un dos membros da asemblea xeral, constituirase unha comisión xestora conforme á composición establecida, que asumirá as funcións da asemblea xeral ata o remate do mandato electoral.

#### *Capítulo VIII. Elección da presidencia e comisión delegada da federación.*

##### ***Artigo 23. Constitución da asemblea xeral.***

1. As persoas electas como membros da asemblea xeral tomarán posesión do seu cargo antes da súa sesión constitutiva que terá lugar en Lugo, Avd, Infanta Elena, s/n-Casa do Deporte 27003 no prazo máximo de cinco días desde a súa proclamación definitiva.

A toma de posesión formalizarase mediante a presentación dun escrito presentado pola persoa elixida aceptando o cargo e dirixido á xunta electoral, no prazo anteriormente fixado.

2. A sesión constitutiva da asemblea xeral será presidida pola mesa que se constituía conforme ao disposto no artigo 9.III deste regulamento.

##### ***Artigo 24. Elección da presidencia da federación.***

1. No día e hora fixados na convocatoria polo presidente da xunta electoral, constituirase a asemblea xeral en primeira ou segunda convocatoria tendo como únicos puntos da orde do día a elección á presidencia e a membros da comisión delegada.

2. O presidente da federación será elixido mediante sufraxio libre, directo, igual e secreto polos membros da asemblea xeral presentes no momento da elección.

3. O voto dos membros da asemblea xeral será único, non admitíndose o voto por correo nin a delegación de voto.

4. Comezada a sesión e constituída a mesa electoral, o presidente presentará os candidatos, iniciando, de seguido, o proceso de votación.

5. Os candidatos poderán expor os seus programas (se o estiman oportuno), procedéndose posteriormente á votación en urna para a elección do presidente, que será secreta.
6. No caso de que se presentase unha soa candidatura, non se efectuará votación.
7. Se non se presentase ningunha candidatura ou non fose válida ningunha das presentadas realizarase pola comisión xestora unha nova convocatoria da asemblea xeral nun prazo de 10 días hábiles.
8. Unha vez presentadas a totalidade das candidaturas iniciárase o proceso de votación.
9. Na primeira votación son elixibles todas as persoas candidatas da lista definitiva. Aquelas que obteñan un mínimo do 10 % dos votos das persoas membros presentes pasarán á seguinte votación. No suposto de que ningunha candidatura acade o 10 % dos votos das persoas membros presentes pasarán á seguinte votación aqueles dúas candidaturas que contén cun maior número de votos. No suposto en que soamente sexa unha candidatura a que obteña o 10 % dos votos das persoas membros presentes pasará tamén á seguinte votación a seguinte ou seguintes, en caso de empates, candidaturas en número de votos. Se algunha candidatura acada a maioría absoluta dos votos nesta primeira votación, será proclamada presidenta da federación.
10. Na segunda votación será elixida presidente da federación a candidatura que nesta fase obteña a maioría absoluta dos votos.
11. No caso de que na votación anterior ningunha candidatura obteña a maioría absoluta dos votos emitidos, procederase a unha terceira nova votación entre as dúas candidaturas máis votadas na segunda votación, resultando elixida a que obteña maioría de votos emitidos. Para o caso de empate, resolverase a favor da candidatura que obtivera maior número de votos na segunda votación e, de persistir o empate, a candidatura que obtivera maior número de votos na primeira votación e no caso de persistir o empate, a favor da persoa candidata de maior idade.
12. Rematada a elección, a secretaría da mesa electoral levantará a acta correspondente, que se expoñerá ao día seguinte no taboleiro de anuncios da federación así como na páxina web da federación nunha sección denominada «procesos electorais» xunto coa resolución da xunta electoral da proclamación provisional da persoa elixida presidenta da federación deportiva, ou na páxina web da Secretaría Xeral para o Deporte para o caso de federacións que non teñan páxina web. Contra a resolución da xunta electoral caberá interpoñer, no prazo de tres días hábiles, recurso ante o Comité Galego de Xustiza Deportiva.
13. Finalizado o prazo de reclamacións, recursos e da súa resolución, a xunta electoral procederá á proclamación definitiva do cargo de presidente ou presidenta da federación.
14. Ao día seguinte da proclamación definitiva do cargo de presidente ou presidenta da federación, procederase á toma de posesión no seu cargo, da cal levantará acta a secretaría da xunta

electoral. Unha copia desta acta será remitida á Secretaría Xeral para o Deporte no prazo de dous días hábiles.

### ***Artigo 25. Elección de membros da comisión delegada.***

1. Os membros da comisión delegada elíxense por e entre os membros da asemblea xeral, mediante sufraxio libre, igual, directo e secreto, podendo substituírse anualmente, polo mesmo procedemento, as vacantes que se produzan. O voto por correo non poderá utilizarse en ningún caso para a elección dos membros da comisión delegada.

2. O número de membros da comisión delegada da Federación Galega de Tiro Olímpico é de 9 membros, máis o presidente que pertence a mesma como membro nato da mesma. Deberá gardarse a seguinte proporción:

- Un terzo da comisión delegada debe ser designado polo titular da presidencia da Federación (3 membros). O Presidente deberá sinalalos no prazo dos dez días hábiles seguintes á súa toma de posesión.

- Un terzo debe corresponder ás entidades deportivas, elixíndose esta representación por e de entre os mesmos ( 3 membros).

- Un terzo corresponderá aos demais estamentos (3 membros), elixíndose esta representación por e de entre os membros dos estamentos con representación na asemblea xeral.

3. Poderán ser candidatos a membro da comisión delegada os membros da asemblea xeral mediante escrito dirixido a xunta electoral, facendo constar a condición de membro da asemblea xeral e manifestando expresamente a vontade de se presentar como candidato a membro da comisión delegada, especificando o estamento polo que se presenta. O prazo será de cinco días hábiles dende a proclamación definitiva dos membros que compoñen a asemblea. Se no prazo establecido para presentar candidaturas se presentase un número inferior aos postos a elixir, ditos candidatos enténdense automaticamente elixidos sen votación e poderán presentarse no acto da asemblea xeral para cubrir as vacantes outros candidatos que serán sometidos a votación entre os restantes membros da asemblea. No caso de empate procederase a unha segunda votación entre os candidatos empatados, e se persiste o empate resolverase por sorteo.

4. O seu mandato coincidirá co da asemblea xeral. Será presidida polo presidente da federación como membro nato desta. Actuará como secretario da Comisión Delegada o da federación.

## **Capítulo IX. Da xornada electoral.**

### ***Artigo 26. Constitución da mesa electoral.***

1. As persoas designadas como membros da mesa electoral para a votación a membros da asemblea xeral e os seus suplentes e da mesa electoral para a votación á presidencia de cada federación, reuniranse o día das votacións unha hora antes da apertura do colexio electoral e procederán á constitución de dita mesa.
2. Se a presidencia ou os vogais non acoden serán substituídos polos seus suplentes.
3. En ningún caso se poderá constituír a mesa electoral sen a presenza da persoa presidenta e persoa secretaria da mesa.
4. No caso de ausencia da persoa presidenta e persoa secretaria, os membros da mesa presentes e os suplentes que acudan redactarán e asinarán unha declaración dos feitos acontecidos, e asumirán a función de presidencia ou secretaria, completando a mesa, total ou parcialmente, no seu caso, coas persoas electoras que estean presentes no local.
5. Transcorrida media hora desde a constitución da mesa electoral, a secretaria redactará a acta de constitución, que será asinada pola presidencia e os vogais.
6. A mesa electoral deberá dispoñer, para cada un dos membros da mesa, dun censo electoral definitivo dos electores da mesa separado por especialidades e estamentos..

#### ***Artigo 27. Das votacións.***

1. Constituída a mesa electoral e na hora prevista a presidencia da mesa electoral anunciará publicamente o inicio das votacións.
2. Unha vez iniciado o acto de votación non se poderá suspender, agás causa de forza maior e sempre baixo a responsabilidade da presidencia da mesa electoral. No caso de suspensión, levantarase a correspondente acta, que será remitida no prazo das vinte e catro horas seguintes á xunta electoral, a fin de que se sinale a data en que se repetirá o acto de votación.
3. O dereito a votar será acreditado no censo electoral, pola inscrición da persoa electora no censo electoral.
4. A secretaria da mesa electoral anotará as persoas que voten, con indicación do número co cal figure no censo, así como o seu DNI, pasaporte ou carné de conducir xunto coa representación con que exerce o seu dereito a voto, se se trata dunha persoa xurídica.
5. O voto será secreto e as persoas electoras depositarán o seu voto na urna correspondente mediante unha papeleta introducida nun sobre.
6. A presidencia da mesa electoral será encargada de velar para que a entrada ao local das votacións sexa libre, de manter a orde nel durante a votación e escrutinio e de asegurar a liberdade das persoas electoras no colexio electoral.

7. A presidencia da mesa electoral, logo de consulta co resta das compoñentes da mesa, poderá expulsar do colexio electoral a calquera persoa que interfira a boa marcha das votacións.

8. Rematado o período sinalado para a votación, o presidente da mesa electoral anunciará que vai rematar e preguntará se algún dos electores presentes non votou, admitíndose os votos que se dean a continuación e non se permitirá a ninguén máis a entrada no local.

9. Acto seguido, votarán as persoas membros da mesa, sempre que teñan dereito, e declararase pechada a votación.

10. No caso de rematar o exercicio do voto da totalidade das persoas electoras que figuren no censo, a presidencia da mesa electoral dará por finalizada a xornada electoral e poderá iniciar o proceso de escrutinio de votos.

### ***Artigo 28. Escrutinio.***

1. Declarada pechada a votación comezará inmediatamente o escrutinio, función que corresponde exclusivamente á mesa electoral.

2. A presidencia procederá ao escrutinio das papeletas en voz alta, unha a unha, exhibindo cada papeleta ás persoas presentes e anotándose o voto correspondente a cada persoa candidata.

3. Concluído o escrutinio, que non poderá ser interrompido, estenderase a oportuna acta asinada por todos os compoñentes da mesa electoral.

4. Son nulos os votos emitidos en papeleta ou sobre de modelos distintos dos facilitados pola xunta electoral; as papeletas que teñan riscadas; os votos en que por calquera razón, non se poida determinar inequivocamente a candidatura elexida: aqueles votos en que se marquen máis nomes dos establecidos no regulamento electoral para cada estamento ou inclúan o nome de persoas non candidatas. No caso de conter máis de unha papeleta coas mesmas candidaturas marcadas, computarase como un só voto válido, para este caso se as candidaturas marcadas son diferentes deberá computarse como voto nulo. As papeletas deberán conservarse para o caso de que se faga algunha reclamación sobre elas.

5. Consideraranse votos en branco aqueles sobres que non conteñan ningunha papeleta e aqueles sobres que conteñan papeletas que non presenten ningunha marca.

6. Feito o recuento de votos segundo as operacións anteriores, que exerza a presidencia preguntará se hai algunha protesta que facer contra o escrutinio. Se non se formulan, ou despois de resoltas pola maioría da mesa, a presidencia anunciará en voz alta o resultado, especificando o número de votantes, de votos válidos, nulos, votos en branco e de votos obtidos por cada candidatura.

7. Concluídas as operacións, os membros da mesa asinarán a acta da sesión, na que figuraran, obrigatoriamente, os seguintes datos:

- a) Número de persoas electoras inscritos no censo de voto por correo.
- b) Número de votos emitidos.
- c) Votos declarados nulos, en branco e válidos.
- d) Número de votos válidos obtidos por cada persoa candidata.
- e) Observacións presentadas ante a mesa electoral sobre a votación e o escrutinio polas persoas candidatas ou interventoras.
- f) Resolucións motivadas da mesa electoral sobre as observacións presentadas e votos particulares.

8. As actas correspondentes aos resultados das votacións e o censo electoral no que conste os electores que exerceron o seu dereito a voto por correo, serán remitidas pola secretaria á xunta electoral e á Secretaria Xeral para o Deporte antes das 16:00 horas do día primeiro día hábil seguinte ao da votación.

9. As actas de escrutinio serán expostas no taboleiro de anuncios da federación así como na paxina web da federación na sección «procesos electorais », desde o día seguinte das votacións e durante dous días hábiles.

### ***Artigo 29. Documentación electoral.***

- 1. A mesa electoral preparará a documentación electoral que distribuirá en dous sobres.
- 2. O primeiro sobre conterá o expediente electoral, composto polos seguintes documentos:
  - a) Orixinal da acta de constitución da mesa electoral.
  - b) Lista do censo electoral de voto por correspondencia.
  - c) Lista numerada das persoas votantes e das papeletas ás cales se lles negase validez ou fosen obxecto dalgunha reclamación.
  - d) Acta de escrutinio.
- 3. O segundo sobre conterá copia da documentación anteriormente citada.

4. Unha vez pechados os sobres, a presidencia e os vogais asinaranos por riba das lapelas que os pechan e serán remitidos, dentro das vinte e catro horas seguintes, á xunta electoral, e a Secretaría Xeral para o Deporte.

***Artigo 30. Do voto por correo.***

- Exercicio do voto por correo

1. O voto presencial prevalecerá sobre o emitido por correo no caso de concorrencia de ambos.

2. As persoas electoras poderán exercer o seu dereito de voto por correo de acordo co seguinte procedemento:

a) As solicitudes de voto por correo poderán presentarse a partir do día seguinte ao da convocatoria das eleccións e ata cinco días hábiles despois da publicación do censo definitivo. Presentaranse preferiblemente por vía electrónica a través do formulario normalizado dispoñible na sede electrónica da Xunta de Galicia, <https://sede.xunta.gal>, dirixida ao órgano superior da Administración autonómica competente en materia de deporte, conforme ao modelo do anexo II (código do procedemento DE200A).

A presentación electrónica será obrigatoria para as entidades deportivas e outras persoas electoras que estean obrigadas a relacionarse electronicamente coa Administración. De conformidade co artigo 68.4 da Lei 39/2015, do 1 de outubro, do procedemento administrativo común das Administracións Públicas, se algunha das persoas interesadas obrigadas á presentación electrónica presenta a súa solicitude presencialmente, requiriráselle para que a emende a través da súa presentación electrónica. Para estes efectos, considerarase como data de presentación da solicitude aquela na que fose realizada a emenda.

Para a presentación electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

No caso das persoas xurídicas deberá solicitar o voto por correo a persoa que apareza no censo como representante.

As persoas interesadas que non estean obrigadas á presentación electrónica das solicitudes, opcionalmente poderán presentalas nos servizos provinciais do órgano superior da Administración autonómica competente en materia de deporte ou en calquera dos lugares e rexistros previstos na normativa reguladora do procedemento administrativo común, utilizando o formulario normalizado dispoñible na sede electrónica da Xunta de Galicia.

b) Recibida a solicitude, a Administración deportiva comprobará a inscrición da persoa solicitante no censo electoral, e enviaralle por correo certificado os sobres electorais e as papeletas de

todas as candidaturas, así como a documentación necesaria, ao domicilio indicado na súa solicitude ou, na súa falta, ao que figure no censo.

c) A persoa electora introducirá a papeleta no sobre de votación do estamento e, se é o caso, especialidade deportiva e circunscrición á que pertenza. Posteriormente, este sobre introducirase dentro do que vai dirixido á mesa electoral do voto por correo, xunto coa fotocopia do DNI ou documento identificativo equivalente e o certificado acreditativo expedido pola Secretaría Xeral para o Deporte.

d) O envío deberá realizarse, nalgunha das oficinas de Correos, antes do sexto día hábil previo á data de celebración das eleccións, e deberá dirixirse ao enderezo do órgano superior da Administración autonómica competente en materia de deporte, que custodiará a documentación ata o día da votación.

3. O prazo límite para recibir os votos por correo finalizará vinte e catro horas antes das votacións presenciais.

4. O sobre que remitirá á Secretaría Xeral para o Deporte para a súa custodia, por correo, consignándose no anverso e reverso do mesmo os datos recollidos no anexo I deste regulamento.

- Escrutinio do voto por correo.

1. Constituída a mesa electoral de voto por correo, a presidencia procederá ao desprecintaxe das sacas e comprobarase a correspondencia entre os sobres e o censo electoral. Non se admitirán os sobres e votos daquelas persoas electoras que consten no censo electoral que votaron de forma presencial.

2. Unha vez comprobado, as persoas membros da mesa abrirán o sobre principal e clasificarán os sobres por estamentos e circunscricións; de seguido a presidencia introducirá os sobres na urna correspondente.

3. Unha vez finalizada a introdución dos sobres nas urnas, comezará inmediatamente o escrutinio, función que corresponde exclusivamente á mesa electoral.

4. A presidencia procederá ao escrutinio das papeletas en voz alta, unha a unha, exhibindo cada papeleta ás persoas presentes e anotándose o voto correspondente a cada persoa candidata.

5. Concluído o escrutinio, que non poderá ser interrompido, redactarase a oportuna acta asinada por todas as persoas que compoñen a mesa electoral.

6. Son nulos os votos emitidos en papeleta ou sobre de modelos distintos dos facilitados pola xunta electoral; as papeletas que teñan riscadas; os votos en que, por calquera razón, non se poida determinar inequivocamente a candidatura elixida; aqueles votos en que se marquen máis nomes dos establecidos no regulamento electoral para cada estamento ou inclúan o nome de

persoas non candidatas. No caso de conter máis dunha papeleta coas mesmas candidaturas marcadas, computarase como un só voto válido, para este caso se as candidaturas marcadas son diferentes deberá computarse como voto nulo. As papeletas deberán conservarse para o caso de que se faga algunha reclamación sobre elas.

7. Consideraranse votos en branco aqueles sobres que non conteñan ningunha papeleta e aqueles sobres que conteñan papeletas que non presenten ningunha marca.

8. Feito o recuento de votos segundo as operacións anteriores, quen exerza a presidencia preguntará se hai algunha protesta que facer contra o escrutinio. Se non se formulan, ou despois de resoltas pola maioría da mesa, a presidencia anunciará en voz alta o resultado, especificando o número de votantes, o de votos válidos, nulos, de votos en branco e de votos obtidos por cada candidatura.

9. Concluídas as operacións, as persoas compoñentes da mesa asinarán a acta da sesión, na cal figurarán, obrigatoriamente, os seguintes datos:

a) Número de persoas electoras ás que se admitiu e notificou o seu dereito a exercer o voto por correo.

b) Número de votos emitidos.

c) Votos declarados nulos, en branco e válidos.

d) Número de votos válidos obtidos por cada persoa candidata.

e) Observacións presentadas ante a mesa electoral sobre a votación e o escrutinio polas persoas candidatas ou interventoras.

f) Resolucións motivadas da mesa electoral sobre as observacións presentadas e votos particulares.

10. As actas correspondentes aos resultados das votacións e o censo electoral en que consten os electores que exerceron o seu dereito a voto por correo, serán remitidas pola secretaría á xunta electoral e á Secretaría Xeral para o Deporte antes da 16.00 horas do primeiro día hábil seguinte ao da votación.

11. As actas de escrutinio serán expostas no taboleiro de anuncios da federación así como na paxina web da federación nunha sección denominada «procesos electorais», ou na paxina do órgano superior competente da Administración autonómica en materia de deporte para o caso de federacións que non dispoñan de web, desde o día seguinte das votacións e durante dous días hábiles.

- Documentación electoral.

1. A mesa electoral preparará a documentación electoral que distribuirá en dous sobres.
2. O primeiro sobre conterá o expediente electoral, composto polos seguintes documentos:
  - a) Orixinal da acta de constitución da mesa electoral.
  - b) Lista do censo electoral de voto por correspondencia.
  - c) Lista numerada das persoas votantes e das papeletas ás cales se lles negase validez ou fosen obxecto dalgunha reclamación.
  - d) Acta de escrutinio.
3. O segundo sobre conterá copia da documentación anteriormente citada.
4. Unha vez pechados os sobres, a presidencia e os vogais asinaranos por riba das lapelas que os pechan e serán remitidos, dentro das vinte e catro horas seguintes, á xunta electoral, e a Secretaría Xeral para o Deporte.

## **Capítulo X. Da moción de censura.**

### ***Artigo 31. Moción de censura.***

A presentación dunha moción de censura contra a persoa presidenta da Federación Galega de tiro olímpico axustarase ós seguintes criterios:

- a) Non poderá presentarse durante os seis primeiros meses de mandato, nin cando resten entre seis meses e un ano ata a data a partires da cal poida realizarse a convocatoria de eleccións, circunstancia a determinar polas normas da federación.
- b) A moción de censura deberá ser proposta e presentada, polo menos, pola terceira parte dos membros da asemblea xeral e incluírá necesariamente unha persoa candidata á presidencia da federación.
- c) A presentación da moción de censura dirixirase á xunta electoral da federación, que deberá resolver o que proceda no prazo de dous días hábiles.
- d) Cando se acorde a admisión a trámite da moción de censura, a presidencia da federación deberá convocar a asemblea xeral nun prazo non superior a corenta e oito horas, a contar desde que lle sexa notificada a admisión. A asemblea xeral que debata sobre a moción de censura deberá celebrarse nun prazo non inferior a quince días nin superior a trinta días, a contar desde que fora convocada.

e) Unha vez convocada a asemblea extraordinaria para o debate e votación da moción de censura, e dentro dos dez primeiros días seguintes a esa convocatoria, poderán presentarse mocións alternativas. En ningún caso a moción de censura alternativa poderá ser subscribida por quen promovera a inicial.

f) A votación, que deberá ser secreta, seguirá o mesmo sistema que o previsto para a elección da presidencia. Para que a moción de censura prospere e cese de forma automática a persoa que ocupa a presidencia, se requirira que, sometida a votación, sexa aprobada pola maioría absoluta dos membros da asemblea xeral.

Se a moción fora aprobada, a persoa candidata que resulte elixida permanecerá no cargo polo tempo que restase ata a finalización do período de mandato da anterior presidencia.

g) Se a moción fora rexeitada pola asemblea xeral, as persoas signatarias non poderán presentar outra ata transcorrido un ano, a contar desde o día da súa votación e rexeitamento.

h) Informarase a través da páxina web da federación da presentación da moción de censura e da data da convocatoria da asemblea xeral, así como do resultado.

i) As decisións que adopten os órganos federativos en relación coa presentación, admisión, tramitación e votación da moción de censura, ou mocións alternativas, poderán recorrerse ante o Comité Galego de Xustiza Deportiva no prazo de cinco días hábiles.

## **Capítulo XI. Do réxime de reclamacións e recursos.**

### ***Artigo 32. Reclamacións ante a xunta electoral.***

1. O coñecemento de todas as reclamacións que se poidan formular na materia electoral corresponde á xunta electoral, e serán todas as súas resolucións impugnables ante o Comité Galego de Xustiza Deportiva.

2. Están lexitimadas para interpoñer estas reclamacións as persoas representantes das candidaturas ou as persoas ou entidades debidamente afectadas polos acordos da xunta electoral.

3. As reclamacións ante a xunta electoral serán presentados persoalmente ou por calquera medio (correo electrónico, burofax, correo certificado, telegrama,...) que acredite fidedignamente en dereito a presentación do escrito na sede federativa. O escrito dirixido á presidencia da xunta electoral e nas reclamacións á xunta electoral deberá constar o enderezo de correo electrónico a efectos das notificacións das resolucións das reclamacións. O correo electrónico da Xunta Electoral es: [Xuntaelectoral2026@fegato.es](mailto:Xuntaelectoral2026@fegato.es)

4. Os prazos para a presentación destes recursos, así como os recurso contra as resolucións da xunta electoral serán os fixados neste regulamento electoral, e respectaranse en todo caso os establecidos no Decreto que regula este proceso electoral si se estableceran outros distintos.

### ***Artigo 33. Recurso ante o Comité Galego de Xustiza Deportiva.***

De acordo co disposto no artigo 88 da Lei 3/2012, de 2 de abril, do deporte de Galicia, correspóndelle ao Comité Galego de Xustiza Deportiva o coñecemento e a resolución dos recursos que neste proceso electoral adopte a federación, podendo adoptar, no ámbito das súas competencias, as medidas necesarias para garantir a legalidade do proceso electoral.

1. Contra os acordos e resolucións da xunta electoral procederá recurso electoral ante o Comité Galego de Xustiza Deportiva, poñendo fin, as resolucións deste, á vía administrativa.

2. Están lexitimados para interpoñer o recurso quen fose parte na impugnación ante a xunta electoral federativa ou as persoas interesadas directamente polo seu acordo ou resolución.

3. Os prazos de imposición do recurso electoral ante o Comité Galego de Xustiza Deportiva será de tres días hábiles contados dende o seguinte ao da notificación da resolución ou acordo obxecto de recurso ou, se fora o caso, dende o momento en que se produza a desestimación tácita da reclamación electoral presentada.

4. O escrito de interposición do recurso deberá expresar:

a) O nome, DNI ou NIE, enderezo electrónico e domicilio da persoa física . Denominación, CIF, enderezo electrónico, a efectos das notificacións das resolucións das reclamacións, e enderezo social da persoa xurídica.

b) Se é o caso, o nome, DNI e enderezo do representante do interesado, podendo acreditar a súa representación, ademais de polos medios legais procedentes, a través de comparecencia ante a Secretaría do Comité Galego de Xustiza Deportiva.

c) A lexitimación para interpoñer o recurso.

d) O acto contra o que se recorre e a razón da súa impugnación.

e) As consideracións de feito e de dereito en que se baseen as súas pretensións, así como as propostas de proba que ofrezan en relación con aquelas.

f) As pretensións que deduzan de tales consideracións.

g) Lugar, data e sinatura.

5. O Comité Galego de Xustiza Deportiva será competente para coñecer, en última instancia administrativa, dos recursos interpostos contra:

a) O acordo de convocatoria das eleccións, así como contra o calendario electoral e fronte a composición da Xunta electoral.

b) As resolucións que se adopten en relación co censo electoral provisional e definitivo.

c) As resolucións adoptadas durante o proceso electoral pola comisión xestora e a xunta electoral da federación en relación co proceso electoral e as restantes cuestións previstas na norma que regula este proceso electoral.

***Artigo 34. Interposición dos recursos.***

Os recursos dirixidos ao Comité Galego de Xustiza Deportiva deberán presentarse nos órganos federativos ou xuntas electorais que, se é o caso, adoptasen as actuacións, acordos ou resolucións que se pretenden impugnar. A xunta electoral remitirá no mesmo día o seguinte á presentación, por correo electrónico ao enderezo [elecciones2026.deporte@xunta.gal](mailto:elecciones2026.deporte@xunta.gal) o recurso co expediente completo e o seu informe. Transcorrido o prazo correspondente sen que se interpoña o recurso, os acordos ou resolucións serán firmes.

***Artigo 35. Tramitación dos recursos.***

Á tramitación dos recursos atribuídos ao coñecemento do Comité Galego de Xustiza Deportiva aplicaráselle a lexislación sobre procedemento administrativo común e o Decreto 120/2013, do 24 de xullo, polo que se aproba o Regulamento do Comité Galego de Xustiza Deportiva, agás os prazos dos distintos trámites que se axustarán ao disposto no presente decreto e aos acordos do Comité Galego de Xustiza Deportiva.

## ANEXO I.

Modelo de sobres de votación e papeletas.

Estamentos:

Clubs da modalidade de prato

Clubs da modalidade de precisión

Deportistas da modalidade de prato

Deportistas da modalidade de precisión

Deportistas Galegos de Alto Nivel

Adestradores da modalidade de prato

Adestradores da modalidade de precisión

Xuíces-árbitros da modalidade de prato

Xuíces-árbitros da modalidade de precisión

a) Sobre de votación. (Sobre 1)

ELECCIÓN S Á ASEMBLEA XERAL DA FEDERACIÓN GALEGA DE TIRO OLÍMPICO.

ESTAMENTO DE .....

CIRCUNSCRICIÓN AUTONÓMICA

Mesa electoral.....

Indíquese, cando corresponda, se a persoa electora está incluída nalgún dos seguintes supostos:

Estamento de deportista: deportista cualificado como deportista (galego/estatal) de alto nivel.

b) Sobre para a remisión do voto por correo. (Sobre 2)

*O sobre para a remisión do voto por correo deberá conter os seguintes datos.*

*No ANVERSO, parte superior esquerda:*

*ELECCIÓN S Á ASEMBLEA XERAL DA FEDERACIÓN GALEGA DE TIRO OLÍMPICO.*

*SOBRE DE REMISIÓN DO VOTO POR CORREO*

*CERTIFICADO*

*Empregado/a de Correos:*

*Valide a identidade da persoa electora por medio de DNI, Pasaporte ou outro documento acreditativo da identidade.*

*Inclúase no presente sobre:*

*-Sobre de votación pechado*

*-Certificado orixinal autorizando o voto por correo, previa estampación do selo de datas.*

*Estampe o selo de datas no anverso deste sobre.*

*No ANVERSO, parte inferior dereita, deberá figurar o destinatario cos seguintes datos:*

*“SECRETARÍA XERAL PARA O DEPORTE*

*APARTADO DE CORREOS 2253*

*Código Postal 15.704*

*Santiago de Compostela, Sucursal 2”*

*No ANVERSO, na parte superior dereita do anverso deberá figurar unha casilla que indique “Franqueo Pagado”, Número de cliente: 81024374 e número de contrato 15000238, así como o escudo da federación galega de tiro olímpico.*

***No REVERSO deberá constar:***

*Nome/Nome do club (segundo proceda):.....*

*Apelidos/código de inscrición no rexistro da SXD:.....*

*Estamento de .....*

*Circunscrición:.....*

*Deportista de alto nivel (no seu caso).....*

***Papeleta de votación.***

*A persoa electora poderá marcar na súa papeleta ata unha persoa candidata mais das que lles corresponde elixir ao estamento e/ou especialidade á que pertence.*

**b) Papeleta de votación**

**VOTACION PARA A ELECCION DAS PERSOAS REPRESENTANTES NA ASEMBLEA XERAL DA FEDERACION GALEGA DE TIRO OLÍMPICO**

Circunscrición: Autonómica

Estamento: .....

Dou o meu voto as seguintes candidaturas:

1.....	26.....
2.....	27.....
3.....	28.....
4.....	29.....
5.....	30.....
6.....	31.....
7.....	32.....
8.....	33.....
9.....	34.....
10.....	35.....
11.....	36.....
12.....	37.....
13.....	38.....
14.....	39.....
15.....	40.....
16.....	41.....
17.....	42.....
18.....	43.....
19.....	44.....
20.....	45.....
21.....	46.....
22.....	47.....
23.....	48.....
24.....	49.....
25.....	50.....

A persoa electora poderá marcar na súa papeleta ata unha persoa candidata mais das que lles corresponde elixir ao estamento e/ou circunscrición electoral á que pertence.

## **ANEXO II**

### **FORMULARIO DE SOLICITUDE DE VOTO POR CORRESPONDENCIA**

**“DE200A”.**

*(Este formulario atópase como Anexo II no “DECRETO 171/2021, do 23 de decembro, polo que se modifica o Decreto 16/2018, do 15 de febreiro, polo que se establecen as bases e os criterios para a elaboración dos regulamentos electorais que deben rexer a realización dos procesos electorais nas federacións deportivas galegas, incluído.” publicado no DOG n.º 249 do 29 de decembro de 2021; páx. 64470-64471.)*

Disposición final

En todo o non previsto no presente regulamento electoral será de aplicación o disposto na

normativa reguladora dos procesos electorais das federacións deportivas galegas e as instrucións da Secretaría Xeral para o Deporte.